



mjesečni Bilten



maj
svibanj
2024.

300

omladinska mreža bosne i hercegovine
ISSN 2831 - 0845

Dragi prijatelji/ce,

Predstavljamo vam **jubilarno izdanje (broj 300)** mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-crnogorsko-hrvatsko-srpskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.orctuzla.ba



SADRŽAJ

Aktivnosti u maju.....	3
Planovi za juni	7
Aktivnosti članova mreže.....	8
Saopštenja/informacije/donatori/pozivi.....	17

Uživajte u čitanju!

UVOD

Drage/drugi,

Evo nas, dvadeset i pet godina poslije...

Pred vama se nalazi jubilarni broj mjesečnog biltena Omladinske mreže u BiH i Omladinskog resursnog centra Tuzla. Broj 300 znači tri stotine mjeseci neprekidnog i kontinuiranog mjesečnog izdavanja...

Počeli smo još tamo negdje u maju 1999. godine, kada smo kroz informacije članica mreže pokušali da dopremo do: donatora, partnera, drugih omladinskih organizacija u BiH, regionu ali i u svijetu. Na početku je bilten bio u suhom tekstu (tada nije bilo ovih silnih grafičkih programa i pdf-ova...), a slali smo ga i poštom, pošto dosta omladinskih organizacija tada nije ni imalo (DA, ZVUČI NEVJEROVATNO, ALI TAKO JE) pouzdanu e-mail adresu. Sjećamo se tih momenata kada se naš kolega Boško Vlajić „tukao“ sa kopir aparatom u namjeri da iskopira i složi 200 primjeraka biltena, a kopir, kao i svaki uređaj onda kada najviše treba, zapinjao, stenjao, „crkavao“....

Kasnije, kada je elektronska pošta postala uobičajena, krenuli smo da ga šaljemo na oko 5.000 e-mail adresa u zemlji i inostranstvu. Svaki mjesec. I vrlo često nam se dešavalo da nas BH Telecom prepozna kao spamere, zbog tih silnih biltena, pa nam blokira e-mail adresu. A onda nastaju borbe i sa njima, u kojima smo ih ubjeđivali šta to radimo i molili da nas odblokiraju, kako bismo nastavili raditi. I tako nebrojeno puta ovih godina.

I evo nas danas, dvadeset i pet godina poslije. Bilten izlazi redovno, na našem i engleskom jeziku i šaljemo ga na: 8.000 e-mail adresa u cijelom svijetu, postavljamo ga na nekoliko stranica i web portala, redovno izlazi na preko 10 mejling lista (sa otprilike 10.000 korisnika), nalazi se na društvenim mrežama, redovno „zatrjavamo“ oko 100 fb grupa...

Svakog mjeseca imate priliku da nas čitate (ili bacate u spam 😊), dijelite, javljate nam se.

Želimo da zahvalimo svima vama koji ste u ovih 25 godina dali svoj doprinos svakom broju biltena. Svima koji ste nam slali informacije, zanimljive vijesti, pozive... Svima vama koji ste ga otvarali i čitali. Svima vama koji ste nam dali do znanja da nas redovno pratite... Nadamo se da ćemo tako i nastaviti... Bar do 500. broja.. 😊

AKTIVNOSTI ORC/HCA U MAJU



„WE CAN DO IT TOGETHER“- hrabri koraci ka 15. izdanju Bedem festa u Nikšiću

U periodu od 27.-29.5. imali smo divnu priliku da učestvujemo u izradi logotipa za [Bedem Fest / Nikšić 2024](#).

U ponedjeljak 27.5. Započeli smo rad na kreiranju logotipa Bedem festa u sklopu projekta "We can do it together" [Regional Youth Cooperation Office - RYCO](#). Naši su mladi volonteri u sklopu ovog projekta imali priliku da prošeću gradom, sudjelujući u defileu, uz Orkestar vojske Crne Gore i pripadnike Vojske Crne Gore. Volonteri ORC Tuzla izuzetno su zadovoljni postignutim rezultatima, kao i stečenim znanjima i poznanstvima, te se raduju nastavku rada na logotipu kao i ponovnim posjetama Nikšiću.




CAT Bosna i Hercegovina

I u maju smo nastavili sa našim redovnim aktivnostima u sklopu inicijative „CAT – Bosna i Hercegovina“. Naše mačke su nastavile da oduševljavaju javnost na društvenim mrežama sa mnogo meme-ova, poziva na seminare, pozitivnih priča o mladima iz Bosna i Hercegovine.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).





Dijalog mladih i vlasti: u susret prvoj strategiji prema mladima FBiH!

Almedina Đulović, članica Omladinske grupe ORC - a Tuzla provela je dva dana u Sarajevu, radeći na Strategiji prema mladima FBiH.



Susret je započeo predstavljanjem Vijeća mladih FBiH i prezentacijom ideje Strategije i onoga što je do sada urađeno. Nakon prezentacije učesnici su imali priliku učestvovati na panel diskusiji "Kako do bolje i kontinuirane institucionalne brige o mladima", gdje su imali priliku slušati predstavnike federalnih ministarstava i predsjednicu Vijeća mladih FBiH, te su imali priliku postavljati pitanja predstavnicima institucija, što su odlično i iskoristili.


Ostatak prvog dana i drugi dan proveli su radeći u dijaloškim grupama, predlagajući promjene u strategiji dodavajući probleme, mjere i aktivnosti.

Dijalog je zatvoren od strane predstavnika institucija koji naglašavaju da je ovo tek početak i da je divno vidjeti mlade ljude na okupu koji zaista vrijedno rade na vlastitoj budućnosti.



“Kad se male ruke slože” – Omladinska grupa ORC Tuzla

Na ovomjesečnom sastanku Omladinske grupe ORC-a Tuzla, održanom 17.maja vodili smo kratku diskusiju oko omladinskog aktivizma. Mladi su sa ostatkom grupe podijelili svoje viđenje omladinskog aktivizma, uloge i položaja u društvu. Po završetku sastanka došli smo do zajedničkog zaključka da omladinski aktivizam igra ključnu ulogu u unapređenju društva i da je potrebno kontinuirano raditi na projektima koji podstiču mlade na aktivno učešće. Uz puno smijeha i šale dogovorili smo i naredna druženja.





ORC vas nagrađuje

U mjesecu maju smo objavili dva nagradna konkursa. Prvi konkurs namijenjen je bendovima na području BiH, u kome pozivamo sve bendove da se prijave i uzmu učešće na ovogodišnjem Bedem festivalu u Nikšiću, Crna Gora. Dok je pak drugi konkurs namijenjen svim umjetničkim dušama, kako u Tuzli tako i van nje. ORC Tuzla ovom prilikom je pozvao muraliste i graffiti umjetnike da osmisle ideju za mural u Tuzli, na temu simboli Tuzle. Ovaj mural je planirano odraditi u sklopu 14. Kaleidoskop festivala u Tuzli..



Škola modernog novinarstva

Naša je **Mirela Biković** ovog mjeseca učestvovala na online školi modernog novinarstva, koju je organizovao magazin BUKA. Neke od tema o kojima je govoreno u toku online sesije su KAKO DOĆI DO PUBLIKE U DIGITALNOM DOBU?; KRATAK SADRŽAJ KAO NOVINARSKI I AKTIVISTIČKI MEHANIZAM – TIKTOK I REELS KAO NORMA; KAKO ISKORISTITI VJEŠTAČKU INTELIGENCIJU ZA RAD U MEDIJIMA?; MULTIMEDIJA – SPAJANJE TEKSTA, AUDIA I VIDEOA.





IV Festival kvir umjetnosti i aktivizma Kvirhana – „Bujrum slobode“



31.5. su naši **Miralem Tursinović** i **Nadina Mehić** imali priliku da prisustvuju otvaranju **Kvirhane**, festivala queer umjetnosti koji se održavao u Narodnom pozorištu u Tuzli, u organizaciji naših prijatelja – **Tuzlanskog otvorenog centra (TOC) Tuzla**. Imali smo priliku da pogledmo izložbu queer umjetnika pod nazivom "Moj komad slobode", te prvu predstavu napisanu od strane nebinarne osobe "**Šta će otac reći**" autora **Admira Adilovića**. Festival su otvorili direktorica USAid-a u BiH **Courtney Chubb**, **Admir Adilović**, izvršni direktor Tuzlanskog otvorenog centra, Direktorica ureda Fondacije HBS u BiH **Paola Petrić**, Predstavnica projekta Smart Balkans, financiranog od strane Ministarstva vanjskih poslova Kraljevine Norveške kao i **Asja Redžić**, predstavnica Grada Tuzla.



REDOVNE AKTIVNOSTI ORC I HCA TUZLA

Tokom maja radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.orctuzla.ba). U okviru toga smo svakodnevno na mejling listu mreže (omladina@orctuzla.ba), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA JUNI 2024.

- ❖ Na društvenim mrežama planiramo objaviti mlade bendove iz BiH, koji su se prijavili na ovogodišnji „BEDEM Fest“, koji će biti održan krajem avgusta. Mladi će imati priliku da glasaju za svoje favorite koji će učestvovati na festivalu
- ❖ Razvoj projekata omladinske grupe Omladinskog resursnog centra
- ❖ Nastavak aktivnosti u okviru bosanskohercegovačke mreže ALF
- ❖ Nastavak rada na projektima, fundraisingu...
- ❖ Pripreme za oslikavanje murala u Tuzli, u okviru festivala mladih Kaleidoskop 2024.



AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac



Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su razgovarali o insektima, gmazovima, tulipanima, pčelama, bubamarama i učili pridjeve za suprotnosti (malo-veliko, nisko-visoko, široko-usko, dugo-kratko) i nazive mjeseci i dana u sedmici na B/H/S jezicima. Najmlađi učesnici su uživali u kreativnom dijelu i modeliranju zabavnih predmeta (npr. malene zečeve od ručnih otisaka i papira, tulipane, bubamare, pčele, razne figure i životinje od plastelina). Grupa je nastavila sa muzičkim radionicama, uvježbavanjem ritmova i pjesama. Učesnici su završili učenje latinice uvježbavajući pisanje slova Z i Ž i počeli sa učenjem ćirilice sa slovima А, Б, В, Г и Д (A, B, V, G, D). Radili su vježbe zagrijavanja i jogu za djecu, a svakog su četvrtka plesali, bavili se sportom i vježbali pažnju i koncentraciju čitajući i slušajući priče (Palčica, Snjeguljica i sedam patuljaka, Mala sirena). Na radionicama engleskog, njemačkog i turskog jezika učili su riječi vezane za dane u sedmici, mjesece, brojeve, zdravlje i pridjeve. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: tolerancija, kulturna raznolikost, pristup znanju, medijska pismenost i borilačke vještine za mlade. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su radili na uvježbavanju gramatike i svakodnevne komunikacije, čitanju i prevođenju kratkih tekstova i fraza, školskim domaćim zadacima i zanimljivim projektima.



Radionice gitare

U okviru novih pjesama, etida i kompozicija na kojima su učesnici radili nalaze se: dvije etide u A molu (D. Aguado, F. Carruli), "Dao Xiang"- (Jay Chou), valcer "Yacambu" (Antonio Lauro), "Knocking on a heaven's door" (Bob Dylan) i "Stella by starlight" (Victor Young).



Radionice sambe

Nastavljen je rad na pisanju tekstova i komponovanju melodijskih dionica za dva trombona na već postojeće harmonske aranžmane.



Muzičke radionice (mlađa grupa)

Grupa je počela da radi na novoj vlastitoj kompoziciji (Ready Freddy). Korišteni su boomwhackersi, prvo kao alat za uključivanje u muzičke igre, a zatim i za rad na određenoj ritmičkoj frazi u cilju razvoja motoričkih sposobnosti i timskog rada.



Međunarodni dan porodice

Ujedinjeni narodi su se počeli baviti problemima u porodici osamdesetih. Od tada se 15. maja obilježava Međunarodni dan porodice! Omladinska organizacija Svitarac je na ovu temu održala radionicu s najmlađim učesnicima. Razgovarali smo o širokom spektru porodice, kao i o važnosti osjećaja sigurnosti. Koristili smo okvir za slike sa figurama porodice, a naši volonteri su takođe napravili i prekrasan plakat sa srcem. Bilo je veoma zanimljivo čuti mišljenja naših najmlađih i koliko mnogo oni vole svoje najbliže!





Proljetni festival 2024.

Omladinska organizacija Svitac je 15. maja održala "Proljetni festival". Zanimljiv muzički program, izložba, "face painting" i kreativne stanice, koje su pripremili lokalni i međunarodni volonteri obradovali su roditelje ali i naše male i velike drugare. Naši gosti su poslušali kompozicije na gitari i violini te pogledali naše najmlađe učesnike kako pjevaju, glume i plešu, a tim lokalnih i međunarodnih volontera adaptirao je nekoliko kratkih priča o proljeću, pčelama i cvijeću u male pozorišne predstave. Nakon programa učesnici su se igrali sa balonima, crtali te se družili uz osvježenje, muziku i ples.



Međunarodni dan zajedničkog života u miru

Generalna skupština UN-a je u svojoj rezoluciji 72/130 proglasila 16. maj Međunarodnim danom zajedničkog života u miru, kao alat redovnog mobiliziranja napora međunarodne zajednice na promovisanju mira, tolerancije, inkluzije, razumijevanja i solidarnosti. Ovaj dan smo obilježili sa najmlađim učesnicima, sa kojima smo razgovarali o važnosti međusobnog poštovanja. Cilj ove aktivnosti je bio početi učiti vrijednosti života u miru već od malih nogu. Učesnici su pogledali edukativni video i napravili simbolična srca sa ispisanim riječima kao što su ljubav, mir i tolerancija. Postavljanje jednostavnih pitanja djeci i mladima o miru i dobroti ne samo da ih može učiniti svjesnijim sebe; takođe će ih navesti na razmišljanje o važnosti da budu ljubazni i istinski mirovnjaci. Za početak, svi bi se trebali zapitati šta za njih znače mir i dobrota.



Diskusija sa učesnicima 15+ je vođena na engleskom jeziku. Učesnici su govorili o važnosti međusobnog razumijevanja, uvažavanja mira i uživanja u različitostima u svakodnevnom životu! Ovo je ujedno bila i savršena prilika za upoznavanje mladih ljudi iz Njemačke, Makedonije, Belgije, Škotske i Bosne i Hercegovine različitih nacionalnosti! Zajednički život u miru zahtijeva inkluzivne pristupe izgradnji mira. Podsticanjem dijaloga, promicanjem međusobnog razumijevanja i njegovanjem saradnje, možemo stvoriti mirniji i harmoničniji svijet za

sve.



Dan kulturne raznolikosti za dijalog i razvoj

Ujedinjeni narodi su proglasili Svjetski dan kulturne raznolikosti za dijalog i razvoj kako bi proslavili bogatstvo svjetskih kultura i suštinsku ulogu interkulturalnog dijaloga u postizanju mira i održivog razvoja. Svitac je ovaj dan obilježio sa našim najmlađim učesnicima. Razgovarali smo o kulturnim razlikama u običajima slavlja, hrani i odjeći. Naša volonterka Orla predstavila je Škotsku i pričala o Nessie (čudovištu iz jezera Loch Ness). Najmlađi su uživali u priči i prezentaciji! Razgovarali smo i o svjetski poznatoj arhitekturi kao što su Ajfelov toranj, Koloseum u Rimu, Big Ben u Londonu, Stari most u Mostaru (BiH). Grupa je takođe napravila veliki poster sa kulturnom raznolikošću iz cijelog svijeta. Sa učesnicima 16+ razgovarali smo o pop-kulturi u SAD-u i TV seriji "Priatelji", te o tome kako su neka od manje očiglednih značenja koja se kriju ispod komedije relevantna za naš svakodnevni život.

Za jun se planira nastavak svih aktivnosti Omladinske organizacije Svitac.

Institut za
razvoj mladih KULT



4th Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org,

web: www.mladi.org



Grad Cazin posvećen je poboljšanju položaja mladih

Grad Cazin je posvećen poboljšanju položaja mladih, a svoju opredjeljenost za pitanja mladih iskazuje upravo kroz proces izrade strategije prema mladima. U proteklom periodu radne grupe su iz svojih tematskih oblasti radile na identificiranju programa i aktivnosti koje Grad Cazin provodi, a koji su usmjereni prema mladima i mapiranju problema. Na novom sastanku Koordinacionog tijela i radnih grupa nastavljene su aktivnosti na izradi strateškog dokumenta.



Učesnicima sastanka prezentirani su najvažniji rezultati iz Analize položaja i potreba mladih grada Cazina koja će uskoro biti dostupna i široj javnosti. Analiza je članovima radnih grupa poslužila za upoznavanje sa podacima koji se odnose na stavove mladih u vezi s dostupnošću stipendija, mogućnostima obavljanja praktične nastave, zainteresiranosti mladih za otvaranje vlastitih biznisa, pitanja stanovanja, brige o zdravlju, dostupnosti neformalnog obrazovanja te sigurnosnom situacijom na području grada. Na osnovu podataka iz Analize istraživanja radne grupe će u narednom periodu raditi na mapiranju ključnih problema za koje će se kreirati rezultati i aktivnosti koji bi trebali dovesti do rješavanja problema i stvaranjem novih prilika i mogućnosti za mlade u Cazinu. Prijedlozi željenih rezultata i aktivnosti će biti uvršteni u Akcioni plan koji će biti sastavni dio dokumenta strategije prema mladima.

Prema posljednjem popisu stanovništva iz 2013. godine mladi čine 23,3% populacije stanovništva u gradu Cazinu što ovu lokalnu samoupravu čini jednom od zajednica sa najvećim udjelom mladog stanovništva te je zbog toga od iznimne važnosti da se kroz proces izrade strategije prema mladima i njene kasnije provedbe poboljša položaj mladih kroz nove programe i aktivnosti.

Strategija prema mladima će otvoriti novu perspektivu u radu sa mladima te ponuditi nove šanse i prilike za razvoj populaciji mladih na području grada u oblasti zapošljavanja, neformalnog obrazovanja, kulture i sporta.



Inoviranjem bijelog štapa djevojke iz Sarajeva olakšavaju kretanje slijepim i slabovidim licima

Tražeci priliku da izraze svoje ideje i razmišljanja o društveno korisnim promjenama i načinima na koje mogu doprinijeti rješavanju različitih problema u društvu, grupa vrijednih mladih ljudi prijavila se na takmičenje u predlaganju društvenih inovacija – **Youth Innovation Award 2023**.

Ideju koja je pokupila najviše simpatija javnosti i stručnog žirija kroz takmičenje te osvojila prvo mjesto predložile su tri mlade osobe iz Sarajeva: **Sara Nalo, Selma Budnjo i Melisa Mutapčić**. **Be My Step** je ideja zahvaljujući kojoj savremena tehnologija postaje suosjećajna pratnja za slijepu i slabovidu osobu. Prema dostupnim informacijama do kojih su ove mlade inovatorice došle, u svijetu je trenutno preko 40 miliona slijepih ljudi, dok svega 8% njih koristi pametni štapa kao pomagalo prilikom kretanja. Upravo ovi podaci naveli su Saru, Selmu i Melisu da ponude rješenje u vidu pametne kutija prilagodljive svakom bijelom štapa. Kako sve to izgleda u praksi možete pogledati [OVDJE](#).



Youth Innovation Award takmičenje već drugu godinu zaredom organiziraju i provode **Ambasada Kraljevine Nizozemske u BiH** i **Institut za razvoj mladih KULT** pružajući tako priliku i podršku mladima da njihove inovativne ideje postanu zajednička bolja budućnost svih nas.

Osvojenu nagradu uložile su u razvoj softverskog rješenja u vidu aplikacije koja je trenutno u fazi testiranja. Pored softverskog dijela, kreirano je i hardversko rješenje senzorne kutije koja, zahvaljujući sensorima, detektuje prepreke koje nisu isključivo na tlu, nego u više nivoa. Da bi ideju realizirale do kraja, potrebno je da u aplikaciju dodaju funkcionalnosti do kojih su došle zahvaljujući mentorskoj podršci.

Be My Step je odličan primjer kako mladi svojim inovacijama mogu značajno poboljšati kvalitet života svojih sugrađana i sugrađanki.



Dijalog mladih i vlasti posvećen prvoj strategiji prema mladima FBiH: dokument kojim će se vlasti voditi, a mladi ponositi!

U proteklom periodu uspješno je završen događaj **Dijalog mladih i vlasti**, posvećen kreiranju prve strategije prema mladima Federacije Bosne i Hercegovine. Događaj je okupio više od 150 učesnika, uključujući premijera Vlade FBiH **Nermina Nikšića**, ministricu Federalnog ministarstva kulture i sporta **Sanju Vlaisavljević**, ministra Federalnog ministarstva rada i socijalne politike **Adnana Delića**, stručnu savjetnicu u Sektoru za visoko obrazovanje Federalnog ministarstva obrazovanja i nauke **Sanelu Kuko**, te mlade iz svih dijelova Federacije BiH, predstavnike institucija vlasti, međunarodne zajednice, omladinskih organizacija i organizacija koje rade sa mladima.

Ovaj događaj je pružio jedinstvenu priliku za razmjenu mišljenja i iskustava između mladih i predstavnika vlasti na federalnom, ali i kantonalnom nivou, a u organizaciji Federalnog ministarstva kulture i sporta, Instituta za razvoj mladih KULT i Vijeća mladih FBiH. Kroz panel diskusiju i rad u okviru tematskih stolova, učesnici su razgovarali o ključnim problemima, potrebama i potencijalnim rješenjima za mlade u Federaciji BiH.

Strategija prema mladima FBiH za period 2024-2027. postavit će temelje za buduće programe i aktivnosti usmjerene na mlade. Nosilac izrade strategije je Federalno ministarstvo kulture i sporta u partnerstvu sa Institutom za razvoj mladih KULT i Vijećem mladih Federacije BiH.



Na kraju događaja, formulirani su konkretni zaključci i preporuke koje će biti integrisane u strategiju i akcione planove. Ove preporuke obuhvataju oblasti obrazovanja, zapošljavanja, zdravstva, socijalne brige, sigurnosti, kulture, sporta i okoliša kao i participacije mladih u društvenom i političkom životu. Dijalog je još jednom potvrdio da mladi u Federaciji BiH imaju mnogo toga da ponude i da su spremni aktivno učestvovati u kreiranju bolje sadašnjosti i budućnosti za njih ali i svih ostalih stanovnika Federacije BiH.



Centar za mlade INPUT
Ul. Mokušnice 10,
72000 Zenica
Tel./fax: +387 62 116
343 www.inputcentar.com
info@inputcentar.com
E-mail: info@inputcentar.com



Dan djevojaka u IKT-u u Centru za mlade INPUT

Dan djevojaka u IKT-u obilježili smo u Centru za mlade INPUT na poseban način! Tema ovogodišnjeg programa bila je posvećena djevojkama u IKT-u i STEM području. Kroz inspirativne radionice, djevojčice i mlade žene imale su priliku zaroniti u svijet programiranja, 3D modeliranja i printanja, te raditi s 3D olovkama.



Posebno smo zahvalni našim dragim nastavnicama: **Aldini Nadžaković**, nastavnici informatike iz OŠ "Vladimir Nazor", te nastavnicima fizike iz OŠ "Mak Dizdar". Njihova podrška i angažman ključni su za inspiraciju i poticanje mladih djevojaka na putu u svijet tehnologije i znanosti.

Ovaj događaj bio je prilika za djevojke da se upoznaju s najnovijim tehnologijama i da razviju vještine koje će im pomoći u budućim karijerama. Radionice su bile osmišljene tako da potaknu kreativnost, kritičko razmišljanje i timski rad, te da djevojkama pruže samopouzdanje koje im je potrebno za uspjeh u STEM područjima.

Radujemo se budućim događajima i nastavljamo s našom misijom podrške djevojkama u IKT-u i STEM-u!

Edukacija za CNC operatera

U mjesecu maju počela je edukacija za **CNC operatera**, organizirana u Centru za mlade INPUT u saradnji sa **Centrom za obrazovanje odraslih ALGEBRA ZNANJA** iz Travnika. Ova obuka je dio programa "**Obuke za tržište rada 2024**" Federalnog zavoda za zapošljavanje.

CNC (Computer Numerical Control) tehnologija predstavlja ključnu komponentu u savremenoj industriji. Obuka za CNC operatera pruža polaznicima znanja i vještine potrebne za upravljanje CNC mašinama koje se koriste u proizvodnji. Ova edukacija obuhvata teorijski i praktični dio, gdje polaznici uče kako

programirati, upravljati i održavati CNC mašine.

Ova edukacija je izuzetno važna jer povećava zapošljivost polaznika, podržava industrijski razvoj i doprinosi povećanju konkurentnosti kompanija. Kvalificirani CNC operateri su vrlo traženi na tržištu rada, a posjedovanje certifikata o završenoj obuci značajno povećava šanse za zapošljavanje u industrijskom sektoru.



Program "**Obuke za tržište rada 2024**" Federalnog zavoda za zapošljavanje ima za cilj osposobiti nezaposlene osobe i omogućiti im stjecanje praktičnih znanja i vještina koje su potrebne na tržištu rada. Kroz ovu inicijativu, mladi ljudi imaju priliku steći obrazovanje koje će im omogućiti bolju budućnost i uspješnu karijeru.

Centar za mlade INPUT nastavlja s provođenjem ovakvih edukacija, pružajući mladima priliku da se razvijaju i pripreme za tržište rada. Radujemo se budućim obukama i uspjesima naših polaznika!



"NetShield" - Borba protiv nasilja djece i mladih na internetu



U okviru glavnog projekta "**Ujedinjeni u vjeri za zaustavljanje nasilja nad djecom i rodno zasnovanog nasilja**", Centar za mlade INPUT provodi svoj mini projekat "**NetShield**" - borba protiv nasilja djece i mladih na internetu u gradu Zenica. Tim povodom, Centar za mlade INPUT posjetio je učenike OŠ "**Mak Dizdar**" kako bi zajedno stali protiv nasilja nad djecom i rodno zasnovanog nasilja.

Vrijedni učenici OŠ "**Mak Dizdar**" aktivno su učestvovali u razgovoru o ovoj važnoj temi, pokazavši izuzetnu svijest i interesovanje za prevenciju nasilja na internetu. Osim toga, imali su priliku učestvovati u interaktivnom kvizu, gdje su pokazali svoje znanje i razumijevanje o sigurnom ponašanju na mreži.

Ove aktivnosti bile su ne samo edukativne, već i izuzetno korisne za jačanje svijesti o važnosti zaštite na internetu. Kroz otvoren razgovor i edukativne igre, učenici su stekli vrijedna znanja koja će im pomoći da se bolje nose s izazovima digitalnog doba.

Ovaj projekat realizovan je uz podršku **World Vision BH Fondacije, Međureligijskog vijeća u BiH, kao i Evropske unije**. Zahvaljujući njihovoj podršci, nastavljamo s našom misijom edukacije i zaštite mladih od svih oblika nasilja.


Zahvaljujemo se upravi OŠ "Mak Dizdar", učiteljici **Adisi Ibrulj**, kao i učenicima. Nastavljamo dalje, zajedno za sigurniju budućnost!

Praksa za studente softverskog inženjerstva u Centru za mlade INPUT

U Centru za mlade INPUT već četvrta generacija praktikanata, studenata treće godine sa Politehničkog fakulteta, odsjek softversko inženjerstvo, uspješno provodi svoju praksu. U okviru ove prakse, naši talentovani studenti, budući softver inženjeri, imali su priliku da se upoznaju sa različitim tehnologijama, uključujući 3D printere i 3D printanje.

Primarni fokus prakse je razvoj desktop i web aplikacija, te rješavanje složenih frontend i backend zadataka. Kroz praktične zadatke, studenti su savladali ključne korake u razvoju aplikacija, od dizajna korisničkog interfejsa do implementacije funkcionalnosti.

Uz stručno vođenje i podršku mentora, studenti su stekli vrijedno iskustvo koje im otvara nove mogućnosti u karijeri i kreativnom izražavanju. Ponosni smo na njihov trud i uspjeh, i jedva čekamo vidjeti njihove buduće projekte i inovacije!



INFORMACIJE / NAJAVE / DONATORI / POZIVI

1. Poziv za mlade iz BiH: Snimate kratki video i osvojite nagrade!

Sarajevo Film Festival i UniCredit Bank, Glavni sponzor Festivala, pokreću projekat „**Idemo na Festival**” s ciljem promocije i unaprjeđenja finansijske pismenosti među mladima.

Pozivamo sve mlade iz cijele Bosne i Hercegovine u dobi od **13 do 19 godina** da do **30.6.2024.** snime reel i pošalju ga na e-mail **snimireels@sff.ba**, uz obavezne kontakt podatke: ime i prezime, godina rođenja, kontakt telefon i adresa.



Slanje reelsa putem navedenog e-maila je obavezno, a pored toga učesnici svoje reelse mogu objaviti na svojim profilima na društvenim mrežama (TikTok ili Instagram) uz hashtagove **#30thSFF #UniCreditBank #IdemoNaFestival**.

Reels treba obraditi jednu od zadatih tema – kartica, digitalno plaćanje, teen račun, štednja, u kombinaciji sa Sarajevo Film Festivalom.

Da bi sudjelovali u projektu „**Idemo na Festival**”, potrebno je ispunjavati sljedeće uslove: reels mora biti autorski rad, snimljen mobitelom u maksimalnom trajanju do 60 sekundi; ne smije biti

prijavljen na neki raniji konkurs/natječaj/nagradnu igru ili prikazan u okviru neke druge radionice ili takmičenja/natječaja/nagradne igre; ne smije sadržavati, niti na bilo koji način poticati govor mržnje, diskriminaciju i netoleranciju ili nasilje; u reelsu ne smije biti korištena muzika koja podliježe autorskim pravima. Prijavom se podrazumijeva da su svi učesnici saglasni s pojavljivanjem u reelsu i njegovim javnim emitovanjem. Jedan učesnik/ca ima pravo samo na jednu prijavu (jedan reels, jedan autor). Prijavom se podrazumijeva da maloljetni učesnici/e učestvuju uz saglasnost staratelja.

Autore/ice tri najbolja reelsa će odabrati kreativni žiri, a imena pobjednika će biti objavljena **5. augusta 2024.**

Pobjednici će biti nagrađeni učešćem u programu „**Volim film**” **30. Sarajevo Film Festivala** te džeparcem na **UniCredit karticama** koje će im biti uručene na događaju prikazivanja pobjedničkih reelsa za vrijeme trajanja **30. Sarajevo Film Festivala**.

Pobjednicima koji žive izvan Sarajeva, dolazak na Festival osigurat će UniCredit Bank.

30. Sarajevo Film Festival će biti održan od **16. do 23. augusta 2024.**

2. Javni poziv za izbor organizacija osoba s invaliditetom

Caritas Bosne i Hercegovine, za potrebe projekta DISC kojeg financira Europska unija, raspisuje

Javni poziv za izbor organizacija osoba s invaliditetom

Za sudjelovanje u programu izgradnje kapaciteta

Ovaj javni poziv je otvoren za sve organizacije osoba s invaliditetom iz Bosne i Hercegovine, uključujući i organizacije roditelja osoba/djece s teškoćama u razvoju. Javni poziv se objavljuje s ciljem izbora 15 organizacija koje će do kraja 2026. godine biti uključene u program izgradnje kapaciteta u okviru projekta DISC.

Program izgradnje kapaciteta podrazumijeva sudjelovanje svim navedenim aktivnostima: osam obuka podijeljenih u dva modula (menadžment i rad s članovima); standardizacija rada kroz izradu samoprocjene organizacijskih kapaciteta na osnovu standarda, savjetovanje vanjskih stručnjaka i izradu dokumenata za organizacije; IT potporu u vidu nabavke laptopa.

Više informacija o Javnom pozivu i programu izgradnje kapaciteta može se naći u [Terms of reference](#).

Prijave su otvorene do 21. lipnja 2024. godine. Zainteresirane organizacije trebaju poslati svoju prijavu ([Prijavni obrazac](#)) i potrebnu dokumentaciju ([Izjava podnosioca](#)) elektronskim putem na email adresu: z.malic@caritas.ba

Projekt DISC *Disability Inclusion and Social Cooperation* provodi Caritas Bosne i Hercegovine, zajedno s partnerima: Udrugom roditelja i djece s posebnim potrebama Vedri osmijeh iz Mostara, Udruženjem slijepih Kantona Sarajevo, Savezom slijepih Republike Srpske i Unijom organizacija osoba s invaliditetom u BiH. Projekt financira Europska unija, a sufinanciraju Caritas Slovenije i Federalno ministarstvo rada i socijalne politike.

caritas.ba

3. USAID – Poziv za konsultante

Da li imate iskustva u kreiranju novih turističkih iskustava i marketinških kampanja za međunarodno i lokalno tržište? USAID Turizam poziva sve kreativce s dugogodišnjim iskustvom da se prijave na angažman za istraživanje turističkih iskustava u jednoj od narednih regija:

- 👉 Sjeverna regija: šira regija Bihaća i Banje Luke,
- 👉 Centralna regija: šira regija Sarajeva, Zenice i Tuzle,
- 👉 Južna regija: šira regija Mostara, Trebinja i Livna.

Prilikom terenskog istraživanja i kreiranja unikatnih i atraktivnih turističkih iskustava, prioritet će imati ona iskustva koja se nalaze duž Vinske ceste Hercegovine i Najljepših sela Bosne i Hercegovine, kao i ona iskustva koja imaju potencijal da postanu “signature experience”.

Saznajte više: <https://bit.ly/poziv-za-konsultante>

Rok za prijavu: 15. juni!

4. Univerzitet u Ljubljani organizuje preko 40 ljetnih škola

Summer school courses 2024 su namijenjeni studentima koji žele posjetiti Univerzitet u Ljubljani, uz priliku za učenje i umrežavanje sa kolegama.

Univerzitet u Ljubljani organizuje preko 40 ljetnih škola – *Summer school courses 2024* iz različitih disciplina: ekonomija i menadžment, pravo, rad sa socijalno ugroženim kategorijama društva i tehničke nauke.

Ljetni kursevi koje nude akademije i fakulteti Univerziteta u Ljubljani pružaju izvanrednu priliku za učenje i umrežavanje.

Pozvani ste istražiti opcije i pronaći ugodan i produktivan način za provođenje ljeta.

Fakulteti i akademije u Ljubljani nude širok izbor od preko 40 ljetnih kurseva iz različitih disciplina: od ekonomskih i poslovnih nauka, prava do socijalnog rada i tehničkih nauka. Neki ljetni kursevi bit će organizirani za učenike osnovnih škola, drugi za preddiplomske i diplomске studente, a neki čak i za istraživače i profesore.

Odaberite jedan (ili više) od odabranih akademskih kurseva i provedite svoje vrijeme na pametan način.

Detaljnije informacije o ljetnim školama možete pronaći putem web stranice: [Summer school 2024 \(uni-lj.si\)](http://Summer school 2024 (uni-lj.si))

Izvor: www.studomat.ba



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla

Hadži Bakirbega Tuzlića 1

75000 Tuzla

tel/fax: 035 258 077

e-mail: orctuzla@bih.net.ba

Mjesečni bilten uređuje Omladinski resursni centar - ORC Tuzla

Urednica Biltena:

Nadina Mehić

Prevod Biltena na

engleski: **Adnan Karamujić**

WEB stranica Mreže:

www.orctuzla.ba

Mejling lista Mreže:

omladina@orctuzla.ba

Webmaster:

anicic.dev@gmail.com

ISSN (BHS Varijanta): **2831 – 0845**

ISSN (Engleski): **2831 0853**